

Date – 23/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram chaklakna ber Aizawl leh Silchar inkar kawngpui a chhiat lutuk avanga tuialhthei harsatna thleng chuan zia-awm lam a pan chhoh beisei a ni.
2. Kar kal ta chhung khan sahimna zawnga Myanmar atanga Mizorama raltlan awm mek chu mi 205-in an pun belh niin sorkar chuan a chhinchhiah.
3. Assam Police leh NIA te chuan kumin August ni 15 a bomb IED kam ru nia puh mi 15 an man.
4. Prime Minister Narendra Modia chuan US-a Indian consulate thar pahnih dah belh a ni ang a ti.

<><><>

OIL SCARCITY

Mizoram chaklakna ber Aizawl leh Silchar inkar kawngpui a chhiat lutuk avanga tuialhthei harsatna thleng chuan zia-awm lam a pan chhoh beisei a ni.

Food, Civil Supplies and Consumer Affairs director Pi Saizikpui chuan Silchar leh Aizawl inkar kawngpui chhiat avang leh chumi nghawng a petrol leh diesel phur lirthei khalhtute an nawrh avanga Mizorama tuialhthei harsatna chu a zia-awm chhoh a beisei thu a sawi a. Tunah hian tuialhthei phurtu lirthei tangkhangte an rawn chhuah chhoh mek avangin, vawiin lam atang chuan petrol leh diesel dinhmun a that chhoh leh an beisei thu a sawi a ni. Mizoram chaklakna ber Aizawl leh Silchar inkar kawngpui chu a bik takin Kawnpui leh Khamrang inkar leh Sethawn a a chhiat lutuk avangin tuialhthei leh bungraw phur truck engemawzat a tangkhang a. Kawng chhe zual lai hi PWD-in khawl leh mihring tha hmanga kar kalta Ningani atang khan kawngpui chhe zual lai siamthat hna thawh tan a ni a, ruahtui a tlak reng tawh loh avang leh a chhe zual lai siamthat a nih tawh avangin Zirtawpni tlai khan Assam lam pan tur truck ruakte chhuahin Inrinni tlai khan helam rawn pan mekte chu chhuah leh an ni.

Inrinni tlai a lo chhote hi a tir lam an tlang theih lai-in zan dar 10 hma deuh khan Kawnpui leh Khamrang inkarah truck pakhat kawng nalah a tang a, hei hian tam tak a dang zui leh a, zing khawvar hma-in kawngpui hi a tlang leh thei ta ni a thudawn a ni.

Tuialhthei phurtu pawl Mizoram Oil Tanker Driver Association (MOTDA) leh Petroleum Entrepreneurs and Transporters Union of Mizoram (PETUM) te chuan kar kal ta Thawhlehi atang khan Aizawl leh Silchar

inkarah hian tuialhthei phurte an tlantir lova, mahse, kawng chhe zual lai siamtha tura sorkarin ruahmanna a siam tak avangin an nawrh hi an titawp leh a ni.

Chaklakna kawngpui chhe lutuk avanga lirthei a kaltlang hleih theih loh avang hian tuialhthei a vangin to tak taka hralh a ni a. Mipui nitin mamawh phai lam atanga lakluh pawh lei tur a avangin a man pawh a sang chak hle a ni.



MYANMAR REFUGEES

Kar kal ta chhung khan sahimna zawnga Myanmar atanga Mizorama raltlan awm mek chu mi 205-in an pun belh niin sorkar chuan a chhinchhiah.

Sorkarin a chhinchhiah dan chuan Mizorama Myanmar raltlan lo luh thar belh mi 205 hi Khawzawl district a lo lut an ni a. Heti hian tun dinhmuna Mizorama sahimna zawnga Myanmar raltlan awm zat zawng zawng chu mi 33,961 an tling ta a. District 11-ah awm darhin, district 4-ah chuan an pual bika siam relief camp-ah awm lovin chhungte leh thiante an belh bakah mi in luahin an khawsa a ni. Myanmar atanga raltlan, tuna Mizoram a awm mekte zinga 10,228 hi mipa an ni a, mi 10,856 hi hmeichhia ni-in mi 12,877 te chu naupang an ni. Myanmar raltlan zinga mi 16,969 te chu an puala siam relief camp 129-ah an awm mek a. Anni ai a tam hret mi 16,992 te erawh chuan an chhungkhat laina leh thiante an belh bakah mi in luaha khawsa-in thenkhat erawh chu an chhungkua a mi huan enkawla ram lama thlama khawsa mekte pawh an awm a ni.

Myanmar atanga Mizorama rawn raltlante hi February ni 1, 2021 a Myanmar sipai hotu lawkte'n sorkarna chelh mektute lak atanga thuneihna an chhuhluh a an hnehlak hnu March thla bul lam khan an rawn lut tan a. Pung chho zelin an tam lai ber phei chuan sng 4 an chuang daih a ni. A then an ram lama let leh emaw hmun danga kal emaw an awm chungin kum 3 leh thla 6 liam hnu-ah pawh an ram boruak avanga haw ngam rih lo hetu zat hi an la awm mek a ni.



REFUGEE AID

Mizorama sahimna zawnga lut raltlante buhfai tanpuina tur pek chungchangah sorkar laipui leh Mizoram sorkar an indawr mek.

Home department hotute hnen atanga thu dawn danin raltlante chhawmdawlina atana cheng vaibelchhe 5 hu buhfai sorkar laipui-in a rawn pek tur chungchangah Ministry of Home Affairs nen an indawr mek a. Union Home Secretary an inthlak hlim deuh chauh a nih avangin he ruahmanna hi a kal muang ta deuh a. Bawhzui mek zel a ni, an ti a. Buhfai cheng vaibelchhe 5 hu hi Ministry of Consumer Affairs, Food and Public Distribution-in a rawn pek tur a nih laiin a man hi Ministry of Home Affairs-in a tum ang a. Buhfai hi Myanmar, Bangladesh leh Manipur atanga rawn raltlante hnena a thlawna sem tur a ni. August ni 14 khan Ministry of consumer affairs, food and public distribution a under secretary chuan hemi chungchangah hian Mizoram food, civil supplies and consumer affairs secretary hnenah lehkha rawn thawnin a thlawna buhfai an rawn pek tur hi metric ton 1,379 leh quintal 34, cheng vaibelchhe 5 hu a nih thu a rawn hriattir a ni.

Sorkar laipui ruahmanna ang chuan buhfai an rawn pek tur hi ni 60 chhunga pek fel hman tur a ni a. Tunah hian ni 38 vel hun a kal tawh a. A phurh chhoh dan tur leh thil tul dang dang buaipui-in sorkar laipui leh Mizoram sorkara a mawhphurtute an indawr chho mek zel a ni. Tun dinhmunah Mizoramah raltlan mi 44,000 vel an awm a. Myanmar atanga lo lut mi 34,000 thelh, Manipur mi sang 8 thelh leh Bangladesh atanga lo lut 2,000 chuang hret an awm mek a ni.



CHAKMA PERSECUTION

Central Young Chakma Association (CYCA) chuan Bangladesh Chittagong Hill Tracts a Dighinala Sadar leh Rangamati khua ami Chakma mi 9 lai thah an ni chu an dem thu an sawi.

Inrinni khan CYCA hian thuchhuah siamin kar kal ta Ningani khan misual rualin Chakma mi 9 that-in chenna in leh Buddhist biakin 100 vel an hal a. Mi engemawzat an hliam bakah chenna in chhuahtsan engemaw zat an awm niin an sawi. Hemi chungchangah hian India rama Chakma pawlte chuan Prime Minister Narendra Modi hnenah ziaka thu thlenin Dr Mohammed Yunus-a kaihhruai Bangladesh sorkar lailawk nena inbiakna buatsaih rih lo turin an ngen a. An lehkha thawnah chuan mi 9-in nunna an chan thu leh in 100 chuang hal a nih thu hi an tarlang a. Bangladesh sipaite chuan hetiang a Chakma mite laka tharum thawh lai hi an thlir mai mai niin an sawi. Lehkathawnah hian Chakma Development Foundation of India dintu Suhas Chakma, Chakma Autonomous District Council CEM Rasik Mohan Chakma, minister hlui leh National Commission for Scheduled Tribes member Nirupam Chakma leh Assam leh Tripura a Chakma hruaitu mi 6-in an hming an ziaak a ni.

An lehkha-ah chuan Bangladesh Chittagong Hill Tracts a tlangmi chengte himna atana awmze nei a hma lak a nih hma chuan India sorkarin Bangladesh sorkar nena inlaichinna tha pangngai kalpui lo se tih an phut niin an tarlang a. Khawvel ram hrang hrangte pawh Chittagong Hill Tracts a tlangmite tihduhdah leh rahbeh an nih chungchang hi auchhuahpui a, Bangladesh sorkar hi thunun turin an ngen a ni.



PEACE PARLEYS

Mizoram thenawm Myanmar ram Chin state a sipai sorkar dotu 'Zofa' pawl hrang hrang zinga inrem lohna awm thin chinfel tumin Inrinni khan pawl hrang palite chu ZoRO uapna hnuai-ah inbia-in inremna an ziaak.

Chinland Government leh Chin National Front (CNF) tangrual mekte leh Interim Chin National Consultative Council (ICNCC) leh Chin Brotherhood aiawhte hi Adviser to chief minister, ZoRO vice president ni bawk Pu Lalmuanpuia Punte pisa-ah an inbia a. He inbiakna-ah hian inremna thuthlung an siam a. Zofate (Chin-Kuki-Mizo) hi thlahtu thuhmun, tawng khat hmang (Same language - different dialect), nunphung thuhmun, serh leh sang inkhawih pawlh, beiseina thuhmun vuana dam leh tlang khatah, thih leh ruam khatah ti thin unau an ni tih an pawm a. Ram leh hnam tana hma an lakna kawngah an thahnemngaih luat avanga unau an inhmu thiam lo chu pawl an tih thu leh, tun hnuah thleng tawh lo se an duh thu an tarlang a. Tun hnuah

buaina leh harsatna a lo awm pawhin tharum leh ralthuam che lek zawng a hmalak loh ni se, tiin ZoRO hmalakna a inremna thuthlung sawiho hi tha an tih thu leh an pawm a thu sawiin inremna tluantling a awm theih na'n aatul dan a zira inbiakna neih leh nise an ti. Inremna Committee siam tha an ti a, meeting leh hunah inremna committee siam nise tiin an thuthlungah chuan an ziaak bawk a ni.

He inremna thuthlungah hian Chinland sorkar aiawhin Chin state chief minister Pu Pa Thang leh CNF aiawhin an pawl vice chairman-1 Pu Thang Ning Kee chuan an hming an ziah hnan a. ICNCC aiawhin Chin state chief minister hlui Salai Lian Luai leh Chin Brotherhood aiawhin Pu Paw Sila te chuan an hming an ziah hnan ve bawk a. ZoRO aiawhin an president Pu R. Sangkawia leh general secretary Pu L. Ramdinliana Renthlei te'n an hming an ziah hnan ve bawk a ni.

Pu Lalmuanpuia Punte chuan inremna lam hawiin ke pen a, remna palai an rawn kal tha chu lawmawm a tih thu a sawi a. Cin state a Zofa unaute inrem hi Mizoram sorkar duhdan a ni a, Aizawla an inkawmkhawmna pawh hi sorkarin hriatpui a ni, a ti a. Sorkarin ZoRO kalflangin remna palai hna an thawk a. India Sorkar pawh hian pawl hrangte inrem hi a duh a, India hian tanpuina rawn pek pawh a duh a ni. a ti.

Pu L. Ramdinliana Renthlei chuan ZoRO in remna palai hna an thawh chhan sawiin, Zofate hi unau vek an ni a, inhmu thiam lo tur an ni lo a, tangrual tur zawk an ni, a ti a. Unau an nih angin inthen thei an ni lo a, indo thei pawh an ni lova, Zofate chu khawi hmunah pawh awm se la lungrual taka awm tur an ni a ti a, Mahni hnampuite hmelmah an insiam tur a ni lo a, hmelma thuhmun nei tlang zawk tur an ni, a ti. Zofate hi Pathian ringtu, Pathianin min puih chuan engtik ni-ah emaw chuan inremin an la awm anga an la insuihkhawm vek dawn a ni.” a ti a ni.

<><><>

ASSAM

Assam Police leh NIA te chuan kumin August ni 15 a bomb IED kam ru nia puh mi 15 an man. Assam Police thuchhuah danin National Investigation Agency te nen an thudawn bawhzuiin heng pawikhawih tumtute hi an chhui a. Assam chhunga hmun hrang hrangah mi 15 an man a, an zingah hian hmeichhia pathum an tel a. Heng an mi mante atang hian an pawikhawih tum hi hriatchhuah a ni a. Dibrugarh, Lakhimpur district bakah Jorhat leh Guwahati atangtea man an ni.

<><><>

PM US TOUR

Prime Minister Narendra Modia chuan US-a Indian consulate thar pahnih dah belh a ni ang a ti. Nizan khan New York-ah India mi chengte hmaah thu sawiin Pu Modia chuan Consulate tharte hi Houston leh Los Angeles khawpuia dah tur an ni a ti a. Pu Modia chuan US-a India mi chengte chu ram palai pawimawh tak an ni tih sawiin America leh India thlunzawmtu an ni a ti a. An thiamna leh theihnate chu tluk phak loh a nih thu a sawi a. PM Modia chaun US President Joe Bidena lo mikhual danah lawmthu sawiin India mi vaibelchhe 140 chuangte tan lawmthu a sawi a ni.

Hetihlai hian nimin khan India leh US te chuan semiconductor fabrication plant thar siam turin an inrem,. Nimin khan Prime Minister Narendra Modia leh US President Joe Biden te chuan he inremna siam a ni thei chu lawmawm an tih thu an sawi a. External Affairs Minsitry sawidanin semiconductor fabrication plant hian infrared, gallium nitride leh silicon carbide semiconductor siamchhuahna tura din a ni ang.



IRAN GAS EXPLOSION

Iran-a lungalhthei khura gas puakah mi 51 an thi. Vanduaina hi South Khorasan province-a thleng niin methane gas putru avanga puak a ni a. Tualchhung sanaa Inrinni zan dar 9 vel khan Madanjoo mine ah gas hi a puak a ni.

Vanduaina thlenna hmunah hian hnathawk mi 69 an awm a. Hliam tuar na tak tak an awm avangin mitthi zat pawh hi a la pun rin a ni.

